


TEZAU LITURGIC

2 AUGUST

SLUJBA SF. ÎMPĂRAT JUSTINIAN I CEL MARE



MOSCOVA, 2000



Служба правоверному Царю Иустиниану I Великому

На велицей вечерни

Блажен муж: 1-й антифон.

На Господи,воззвах:стихиры на 8,глас 4:

Почитая лики праведных, / правоверно и
благочестно в мире сем скончавшихся, /
величаем в Троице славимого Бога, / темже и
тебе, царю Юстиниане, / веру и благочестие
цело соблюдающего, / и деянием твоим Богу
угодившего, / и во обителях Небесных / с
праведными торжествующаго, / единогогласно
почитаем.

Глас 1:

Данный ти талант державный, Богомудре, /
возрастил еси сугубо благодатию, / о немже и
праведно потрудился еси, Юстиниане. / Темже
слышиши: / благий рабе и верный, / вниди в
радость Господа твоего.

Правым подобает похвала, / якоже
царствующий поет пророк. / Тем и , Давиду
внимая, / тебе, верный рабе Господень, / мзду
праведничу приимшаго, / похвальными песнями
ублажаем.

Род правый благословляй Вышний, / благослови
и тебе благословением Своим благостынным, /
благоверный царю Юстиниане, / и якоже на
земли пред человеки, / сие на Небеси пред
Ангелы и духи праведных / прославляет тя
Своею благодатию.

Слава, глас 2:

Приидите, собори верных, / мудрого почтим
Юстиниана в песнях: / верою бо Богу
благоугоди, / и праведного венца сподобися, / и
со Ангелы селение стяжа. / Ему же любовью
вопием: / прииди и стани с нами, святе, / и
предначинай торжество памяти твоея, / и моли
Христа Бога о душах наших.

И ныне, Богородичен:

Радуйся, Марие Богородице, храме
неразрушимый, / паче же святой, якоже вопиет
пророк: / свят храм Твой, дивен в правде.

Вход. Прокимен дне и чтения 3.

Премудрости Соломони чтение:
Праведных души в руке Божией:

Премудрости Соломони чтение:
Праведницы во веки живут:

Премудрости Соломони чтение:
Праведник, аще постигнет скончаться:

На стиховне стихиры, глас 2:

Киими похвальными песньми / воспоем
Юстиниана, / иже торжеству виновного. /
Славен бо в житии на земли показался еси, /
славнейший же от добрых дел явився, /
заповедем последуя Владыки твоего. / Но аще и
недоумеем, хвалити достойне, / укрепи ны,
мудре, поющих тя, / и проси от Христа велию
милость.

Стих: Праведник, яко финикс, процветет, / яко
кедр, иже в Ливане, умножится.

Добродетельми, яко крилами, / на Небо возлетел
еси / и душу твою яко жертву чисту / Богу
представил еси, / оставив нам утешением
деяния твоя, / еже благоговейно почитаем.

Стих: Возвеселится праведник о Господе / и
уповает на Него.

Великих даров сподобил еси, Владыко, царя
Юстиниана, / яко право ходи пред Тобою; /
сподоби тех и нас, молящихся Тебе прилежно, /
и настави нас, да ходим пред Тобою / выну
путем правым.

Слава, глас 4:

Днесь Церковь Православная / тайно
ликовствует, / новою одеявшись одеждою, / яко

порфирию и виссоном, праведного Юстиниана,
/ и, сею одеяна, красящийся, взывает: / величит
слава моя Господа, / даровавшего ми моего
красителя. / И паки со дерзновением зовем: /
Иже прославивый Твоего праведного, Христе
Боже, / умири мир и спаси души наша.

И ныне, Богородичен: глас тойже:

Призри на моления Твоих раб, Всенепорочная:

Тропарь святого, глас 3:

Красоту возжелев славы Божия, / в земней Тому
благоугодил еси / и, порученный ти талант добре
возделав, усугубил еси, / о немже и подвизався
праведно. / Отонудуже и мзду деяний твоих, /
яко праведник, приял еси от Христа Бога: /
Егоже моли спастися / поющим тя, Юстиниане.

На утрени

На Бог Господь: тропарь святого дважды.

Слава, и ныне, Богородичен.

По 1-м стихословии седален, глас 1:

На камени непоколебимыя веры нозе твои
утвердил еси, Богомудре, / никакоже буря тебе
треволнения поколеба, / но немокренно сию
прешел еси, к Богу возвысився, / Емуже и
содворяясь, радостно Тому зовещи: / слава

милосердию Твоему, Спасе, / слава Царствию
Твоему, / слава смотрению Твоему, Едине
Человеколюбче.

Слава, и ныне, Богородичен:

Руце Твои Божественнии, / имиже Содетеля
носила еси, Дево Пресвятая, воплощенна
Божеством, / простерши, умоли избавитися нам
от искушений, и страстей, и бед, /
восхваляющим Тя любовью и вопиющим Тебе: /
слава Всельшемуся в Тя, слава Прошедшему из
Тебе; / слава Свободившему нас рождеством
Твоим.

По 2-м стихословии седален, глас 6:

Велию красоту творяше Аарону миро, /
сходящее на браду его / и на ометы одежды его,
/ но много паче вящшую красоту творит
благодать Божия, / на праведного царя
Юстиниана излианная, / подающая деяниям его
прославление, / душе же его славу бессмертную.

Слава, и ныне, Богородичен:

Начало спасения / Гавриилово провещание к
Деве бысть, / слыша бо, еже радуйся, и не убеже
целования, / не усумнеся, яко Сарра в сени, /
но сие глаголаше: / се раба Господня, / буди
Мне по глаголу твоему.

По полиелеи седален, глас 8:

Повеленныя ти заповеди приемь, / разумне
страх Божий в себе приял еси первее, / имже и
окормляем, стезю правую не погрешил еси, /
еюже и шествуя, во двери праведническия вшел
еси, / с нимиже проси поющим тя смирение, /
яко да благодарно поем ти, мудре: / радуйся,
Юстиниане пребогате.

Слава, и ныне, Богородичен:

Повеленное тайно прием в разуме, / в крове
Иосифове тщанием преста Бесплотный, глаголя
Неискусобращней: / Приклонивый
снисхождением небеса, вмещается неизменно
весь в Тя. / Егоже и видя в ложеснах Твоих,
приемша рабий зрак, ужасаюся звати Тебе: /
радуйся, Невесто Невестная.

Таже степенна, 1-й антифон 4-го гласа.

Прокимен, глас 4: Возвеселится праведник о
Господе / и уповаает на Него.

Стих: Что воздам Господеву о всех, яже воздаде
ми?

**Всякое дыхание: Евангелие от Матфея, зачало
43.**

По 50-м псалме стихира, глас 6:

Иже благодатию Божественного Духа /
собрании днесь празднолюбцы, / лик
составльше, поем песнь нову, / память

сотворяще треблаженного Юстиниана, / в нюже сошедшися, Спаса величаем / и торжества виновнику молебне рцем: / яко имый дерзновение у Царя Славы, / моли избавитися вреда всякого / от души славящим тя.

Канон Богородицы со ирмосом на 6, глас 2, и
святаго на 8, глас 4.

Песнь 1.

Ирмос: Отверзу уста моя, / и наполнятся Духа, / и слово отрыгну Царице Матери, / и явлюся, светло торжествуя, / и воспою, радуяся, Тоя чудеса.

Запев: Праведне царю Юстиниане, моли Бога о нас.

Ликуя со ангельскими соборы присно, / у Престола Божественного, световидныя зари исполняем, / омраченную душу мою озарити молися, / яко да по долгу возмогу воспети память твою, Юстиниане.

Аще и по достоянию восхвалити тя недоумеем, чтуще тя, / но, елико по силе, песнь плетем славней твоей памяти, / проповедающе твое житие, / но якоже любочаден, приими сие, аще и не по достоянию хваление.

Зачало добродетельного твоего жития, страх Господень взял еси от юности, Юстиниане, / и сей имел еси, наставляющ тя к пути правому, /

имже шествуя, во дворы Господни вшел еси.

Богородичен: Ангельских сил вемы Тя
превышшую, людие вернии, / Спаса и Бога
прославляем, Дево Всепетая, / и, Богородицу Тя
от души славяще, молимся: / от супостатных
нашествия поюция Тя избави.

Ин канон святаго, глас 8.

Яко елень желает на источники водныя, / сице
желаше душа твоя, праведне Юстиниане, к
Богу, / Иже и прия тя с любовью и сотвори
наследника Царствия Своего.

Праведное жизни твоея имел еси течение, / и
подвигом добрым в законе Божии подвизался
еси / и веру соблюл еси, / сего ради отложися
тебе венец славы бессмертныя.

Егда на стражи твоей стал еси богоданыя ти
власти, Юстиниане, / тогда недреманное око
стяжал еси, к соблюдению богоданного ти стада,
/ о немже трудился до смерти, / отнюдуже и
мзду приял еси трудов твоих.

Богородичен: Вседерзостную крепость
иноплемеников, о Владычице, потреби, / люди
же верныя, Тебе славящия, спаси и укрепи, /
иже Сыну и Богу Твоему песнь воспевающих.

Катавасия по уставу.

Песнь 3.

Ирмос: Твоя песнословцы, Богородице, / живой и независтный Источниче, / лик себе совокупльшия, духовно утверди; / в Божественней Твоей славе / венцев славы сподоби.

Видев Создавший един сердца человеков, Богомудре Юстиниане, / сердца твоего, еже к Нему, нрава же кроткое и незлобивое, / на престоле царствующих посади / и пастыря тя христокрасных людей устрои.

Аврааму на земли странолюбием подобяся, / имел еси десницу благоподатну: / странные, и больные, и мимоходящая приемля, / сподобился еси и Бога прияти в тебе, Юстиниане.

Преиспращенный и славный дом твой, достоблаженне Юстиниане, / егоже на землидобродетельными лепотами украсил еси, / желая вечных благ получитьи, мудре, / отнюдуже и Царствия Небесного сподобился еси.

Богородичен: Ангельских сил вемы Тя превышшую, людие вернии, / Спаса и Бога прославляем, Дево Всепетая, / и, Богородицу Тя от души славяще, молимся: / от супостатных нашествия поющия Тя избави.

Ин.

Истинная лоза винограда Христова был еси,
праведне Юстиниане, / сего ради и в житии
твоём мног плод добродетелей израстил еси.

Иже на высоту хулу глаголавый, / гордым оком
видев твоя полезная, Юстиниане, / лестными
ухищренми украсти ты покусися; / ты же,
Мудрость сущую — Христа Бога в дому сердца
твоего имый, / того под нозе твои покорил еси,
вопия: / несть свят, паче Тебе, Господи.

Коль праведен и щедр еси, Благоутробный
Владыко, / в мздовоздаянии Твоим
праведником! / Довлеет и един образ: / како
праведника Твоего Юстиниана ущедрил еси.

Богородичен: От утробы матери Себе Богу
посвятила еси, Отроковице, / и усердием Ему
служила еси, / тем Тебе и Бог воздаде по
правоте, / яко Ты вси роди Богородицею
ублажают.

Седален, глас 8:

Премудростию и разумом украшен, / мужеским
и твердым сияя смыслом, / благ же и кроток, и
милостив был еси\ и врученную ти паству добре
упасл еси\, / темже и венец праведного приял
еси. / Сего ради вопием ти, Юстиниане: / моли
Христа Бога согрешений оставление даровати, /
чтущим любовию святую память твою.

Слава, и ныне, Богородичен:

Яко Всенепорочная Невесто Творца, / яко
Неискусомужная Мати Избавителя, /
приятелище яко сущи Утешителя, Всепетая, /
беззаконию мя суща скверно жилище / и
демонов игралище в разуме бывша, / потщися
от сих злодействия мя избавити / светло
жилище добродетельми соделавши, /
Светодательная и Нетленная, / разжени облак
страстей, и Вышняго причастия сподоби, / и
Света невечерняго молитвами Твоими.

Песнь 4.

Ирмос: Седяй в славе на Престоле Божества, /
во облаце легце, / прииде Иисус
Пребожественный / Нетленною Дланию и спасе
зовущия: / слава, Христе, силе Твоей.

Храм Божий явился еси по достоянию, / храм
Тому благолепен соделал еси, / всех приводящ
во удивление, обилием кипя всяким,
Юстиниане, / в немже и лики иноческия собрал
еси.

Вверенный тебе талант державный, Юстиниане,
/ не в земли скрыл еси, яко раб ленивый, / но
делав, яко раб бодрый своего Владыки, / егоже
и многоусугубленна Тому принесл еси.

Даны быша тебе от Господа таланты душевныя
и телесныя, / ихже во благо употребляя, / в

краткое время многое приобретение Ему
сотворил еси, / сего ради и введе тя, яко раба
благаго и верного, в радость Свою.

Богородичен: С радостью готова сущи к званию,
/ на неже избра Тя Вышний, Дево Марие, / со
смирением Гавриилу рекла еси: / се раба
Господня. / Мы же, Тя сице смилившуюся,
Владычицею ныне почитаем.

Ин.

Слушай молитвы праведных Твоих, Господи, /
услыши молитву и праведника Твоего
Юстиниана, / юже приносит Тебе о людех
Твоих.

Хваляшеся иногда евангельский юноша пред
Господем, / яко вся заповеди соблюде от юности
своея, / но не послуша Господа, малое сотворити
ему повелевающаго, / и не иде вслед Его, / ты
же, праведне Юстиниане, и, не хваляся,
повелений Господних слушал еси / и Ему с
веселием последовал еси.

Авситидийского Иова житию всекрасному
подобяся мудростию и разумом, / просвещен
явился еси, / смирением сердца украшен и
высотою жития сияя, / и паче сих высочайшая
исправил еси, Юстиниане.

Богородичен: Благопременна сотвори,
Владычице Всепетая, бодрыми Твоими

молитвами / от Твоея утробы явльшегося
человеком плотию, / яко да обрящем, Тебе
славящий, грехов оставление / и наследницы
явимся славы Сына и Бога Твоего.

Песнь 5.

Ирмос: Ужасошася всяческая / о Божественней
славе Твоей: / Ты бо, Неискусобрачная Дево, /
имела еси во утробе над всеми Бога / и родила
еси Безлетнаго Сына, / всем воспевающим Тя /
мир подавающая.

Твоего ради милования, еже на земли стяжал
еси, / правды ради твоея, / приобретение стоит
тебе нетленно, / еже и получив, обрел еси трудов
твоих возмездие / и живещи с лики праведник,
радуясь.

Во всех днех жития твоего, праведне
Юстиниане, / великих светило явился еси
добродетелей, / имиже Бог благоугождается.

Светлу душу твою хотя представить Богу, / в
праведности ходил еси, / сего ради по твоём
успении вшел еси, / аможе ничтоже нечисто
входит.

Богородичен: Душу мою озари, омраченную
прегрешеньми и ослепленную лютыми похотьми,
/ Яже Солнце родшая Праведное, Приснодево: /
елика бо хочещи, можеши.

Ин.

Да подвижится к твоему похвалению всяк язык,
/ яко хвален стаду твоему был еси вождь, / и
яко, сих привед, упасл еси на пажитех
животных, / и яко заступник тем в животе и по
смерти явився, / и яко о нем подвизался честне.
Светящую тя свещу во дни и нощи, Юстиниане,
/ твоя честная деяния стяжавши, Церковь
веселится, / просвещаемая днесь зарею, юже
свыше приял еси Духа Святаго осенением,
имиже всякия лести избежавши, ты прославляет.
Ради праведных Твоих, Господи, / простираеши
лучи Твоея милости на грешныя: / озари убо и
нас, недостойных рабов Твоих, лучами Твоего
благоутробия / ради правоверного царя
Юстиниана.

Богородичен: Позлащенными добродетелей
ризами / одеянна и преиспещренна была еси на
земли, Пренепорочная, / сего ради и Бог Слово
во утробе Твоей / благоволи облещися в плоть
человеческую.

Песнь 6.

Ирмос: Божественное сие и всечестное /
совершающее празднество, / Богомудрии,
Богоматере, / придите, руками воспещим, / от
Нея рождаемого Бога славим.

О, всекрасныя купли твоя, святе, / о, чудного

твоего изменения: / маловременную бо славою вечную искупил еси, / в нейже ныне живеши, о нас молися.

Еже по достоянию чудного твоего жития, / достойно желаему славу, ты от Христа Бога получил еси, / идеже ныне предстоиши, / в ризу светлу от добродетелей облечен, радуяся.

Житию твоему, Юстиниане, кто не удивится, / собрал бо еси, якоже пчела благоразумная, множество цветovidных добродетелей: / в нихже, красуясь, нас облагоухаеши.

Богородичен: Мати Приснодево, / яко Чистую Тя, Слово Чистое возлюби, / из Тебе воплощся, обнови человека / и Своего угодника прослави чудесы.

Ин.

И мягкия носяй одежды, царю Юстиниане, / сице житием твоим праведным в краткое время угодил еси, яко многим дивитися, / иже угодиша Ему, долговременно облачающееся во вретище.

Уверен быв, яко и златотканная ризы общему подлежат тлению, / потщался еси в животе твоём из добродетелей исткати себе ризу нетления, / в нейже ныне красуешься.

Совесть имел еси благу, / и око сердечное взирающее к Богу, / темже внят молитве твоей,

премудре, / и со праведными сочетал ты есть.

Богородичен: Страсти плоти моя, / и ума моего
двизания неподобная утоли, / молю Тя
Пречистая Дево, и исправи мя заблуждышаго
умом.

Кондак, глас 8:

Возбранника благочестия всеизрядна / и
поборника о истине непостыдна, / честне и по
долгу восхваляют ты людие, Богомудре, / но яко
имея дерзновение ко Христу Богу, / тебе
славящим смирение испроси, да зовем ти: /
радуйся, Юстиниане приснопамятне.

Икос:

Имать тебе твое отечество яко жива и по
смерти: / дар пречестен и богатство
неиждиваемое, заступника велика / и
возбраника крепка, о благолюбезне; / темже и в
день скончания твоего песни достохвальныя
приносим ти, / и, величающе ты, взываем тебе
таковая: / радуйся, столпе Православия
непоколебимый. / Радуйся, здателю и красителю
святых церквей; / радуйся, обильное милование
нищих. / Радуйся о благочестии потрудивыйся;
/ радуйся, яко тобою украсишася православнии.
/ Радуйся, яко слава о тебе протече по
вселенней; / радуйся, наш заступниче и
избавителю. / И сия тебе приносим, святе, яко

достойну, и молим тя: / возмездие славящим тя
подаждь / и всякого озлобления нас избави, да
зовем ти: / радуйся, Юстиниане приснопамятне.

Песнь 7.

Ирмос: Не послужиша твари Богомудрии / паче
Создавшего, / но, огненное прещение мужески
поправше, / радовахуся, поюще: / препетый
отцев Господь и Бог, благословен еси.

О Бозе верою усердною возмогая, / множество
храмов святых обновил еси, / множайшия же от
основания воздвигл еси Господу в славословие, /
ихже ради дом Духа Святаго себе соделал еси,
вопия, / благословен Бог отец наших.

Испещренну лествицу, и до Небес досяжущу, на
земли, яко искусный, художник Юстиниане,
устроил еси: / быша во тебе, якоже степени
лествичныя, благая дела, / имиже востек, идеже
желал еси, зовый: / благословен Бог отец наших.

Разума светлости в добродетели жития / и
прежде успения ты, мудре, исполнь был еси, /
краснейший же явился еси по подвизех
праведных. / Темже ты яко Божия угодника
почитаем, зовуще: / благословен Бог отец
наших.

Богородичен: Адам от тли рождеством Твоим
избавися, / кроме бо тления человеческого
рождши, / темже тления злаго мя, Отроковице,

избави / мольбами Твоего Юстиниана,
Владичице.

Ин.

С лики ангельскими в светлом пребывании / и
с праведными соборы водворяяся яко
праведник, Юстиниане, / у Престола всех Царя
и Бога нашего, ликуя, зовещи: / благословен Бог
отец наших.

Яко чистое добродетелей зеркало был еси на
земли, царю Юстиниане, / сего ради Вышний,
восприяв душу твою в чертог Свой Небесный, /
остави нам образ, добродетелей твоих, / да
последуем стопам твоим.

Не стыдимся хвалиться, праведниче Божий, /
яко молитва твоя к Богу много может
поспешествовати нам во благое: / вемы бо, яко
молитвы праведных приятны Ему.

Богородичен: Блажим Тя, Богородице Дево, / и
блажити никогда не престаем: / благословенна
бо Ты еси в женах / и благословен Плод чрева
Твоего.

Песнь 8.

Ирмос: Отроки благочестивыя в пещи /
Рождество Богородично спасло есть; тогда убо
образуемое, / ныне же действуемое, / вселенную
всю воздвизает пети Тебе: / Господа пойте, дела,
/ и превозносите Его во вся веки.

Аще и устремляхуся мира сего волны, еже
потопити праведное житие твое, / но ничтоже
успеша: / ковчег бо тебе бысть чистота, /
кормило — Православная вера, / якорь —
твердая на Бога надежда, / ветрило — любовь к
Богу и ближним.

Прославляем Тя, Господи Боже, / яко, удивляя
хотения Твоя во святых Твоих, / удивил еси
хотение Твое и в правоверном императоре
Юстиниане.

Услыши мольбы и пения глас людей твоих,
святые, / вонми воздыханию стада твоего, яко
отечестволюбец, / и противися гневне на нас
воюющим: / вемы бо многомощную молитву
праведного.

Богородичен: Удивляхуся волсви египетстии
силе чудотворного жезла Моисеова, / мы же
удивляемся Тебе, Марие: / како Невместимого
всеми во утробе Твоей вместила еси.

Ин.

Малого и худаго моления нашего не презри,
молим тя, / жителю Вышняго Царствия
Юстиниане, / но призирай на твое стадо, якоже
при животе и по смерти, / и смирение испроси
хвалящим тя.

Во славу и светлость Божественную прешед
духом, яко любочаден, / нас, сырых, не оставил

еси, / но, якоже Илия Елисею милоть во
утешение, / сице плоды деяний твоих нам
оставил еси, / любя и по смерти питомцы твоя,
поющая: / отроцы, благословите, священницы,
воспойте, / людие, превозносите Христа во
веки.

Да радуется днесь множество Божественное: /
во время жития сияющи досточудными лучами
своих исправлений / и озаряющи верныя,
Юстиниане всебогате. / Темже торжествуим,
зовуще: благословите, вся дела Господня,
Господа / и превозносите во вся веки.

Богородичен: Паче естества и слова Владыку
всех родила еси / и питаеши от сосцу Твоею
всем во благо время готовящаго трапезу. /
Егоже прилежно, Пречистая, о нас моли.

Песнь 9.

Ирмос: Всяк земнородный / да взыграется,
Духом просвещаем, / да торжествует же
Бесплотных умов естество, / почитающее
священное торжество Богоматере, / и да вопиет:
/ радуйся, Всеблаженная Богородице, / Чистая
Приснодево.

Благословен еси Господи Боже наш, / яко веси
пути непорочных, / и достояние их во веки
пребывает, / егоже причастником быти
сподобил еси / и праведного царя Юстиниана.

Радущися во всепразднственный день твоего
скончания, / Церковь верных днесь, со всеми
окрестными совокупльшися, празднует, /
хранителя и заступника бодро стяжавши: / юже
ограждай твоим предстательством, яко да тя
величаем.

Украсив душу твою Божественными лепотами, /
красному Слову славен предстоиши во
дерзновении мнозе. / Сего ради молим тя: /
свыше нас, певцы твоя, назирай милостивно, /
стране нашей победительная на супостаты
испроси, / яко да тя ублажаем.

Богородичен: Призираяй на смиренныя рабы
Своя Вышний / призре и на Твое смирение,
Пречистая Дево, / и превознесе Тя паче всех
дщерей сынов человеческих.

Ин.

Иже празднолюбных собори, / иже в торжество
ныне хвалимого Юстиниана собравшеся, /
насладимся торжства спасенного, / зряще
пророческих днесь сбывшихся словес: / еже
праведницы во веки живут и от Господа сим
прославление, / Егоже величаем.

Тебе молим, святе, прилежно: / о Церкви верней
помолися, / о ней же и праведно потрудился
еси, / Православней же вере крепость на ереси
врагов испроси, / смирение же чтущим тя,

Юстиниане.

В праздник святых твоя память, Юстиниане, сошедших, лица веселятся, / с ними же и мы песнями ты почитаем. / Прииди же и ты, святе, и предначинай торжественная, / озлобления же нас всякого избави, / яко твое есмы стадо.

Богородичен: О Всепетая Царице, / Яже Безначальнаго рождши Царя Славы, / поющим Тя согрешений прощение и житию устроение благоприбытно подаждь / Твоего Юстиниана мольбами.

Светилен, глас 8:

Прекрасный добродетелей храм на земли быв, правоверный царю Юстиниане / остави нам по своем успении дела твои праведнии, / душею же вниде в храм нерукотворенный.

Слава, и ныне, Богородичен:

Великим благодарением должны мы Тебе, Владычице: / едина бо Ты от земнородных явилася еси / достойна прияти во утробу Твою Сына Божия, / Егоже Отец посла на землю разрушити законную клятву / и подати вечное всем благословение.

На хвалитех стихиры на 4, глас 6:

Приникая в бездну судеб Божиих, / удивляемся чудному Его о праведных Своих смотрению: /

очи бо Его выну на них / и уши Его выну в
молитву их, / и прославляет их временно и
вечно, / якоже видим смотрение Его и о тебе, /
правоверный царю Юстиниане, / темже тя
ублажаем.

Яже красная суть мира сего, / вся сия быша в
руку твоею, / егда на земли сей обитал еси; /
егда же и от мира сего исшел еси, / вся паки
восприял еси благая, праведным уготованная, /
вшел бо еси в землю обетованную, / яже не
медом и млеко течет, / но есть Царство
Небесное; / сего ради тя ублажаем.

Глас 4:

Добляго исполнителя заповедей Божиих, /
сошедшеся, восхвалим по достоянию праведного
Юстиниана, / славного в житии земного
владычествия, / краснейшаго же в добродетелех
показавшася, / иже всякою добродетелию
обильного, / и со Ангелы Христу предстоящаго, /
и о иже память Его с любовью поющих
молящагося.

Добляго и мужественнаго во бранех / и
адаманта твердейшаго, / поборника всеистинна
о Православии, / благочестия столпа
непоколебимаго, / чуднаго Юстиниана ублажим,
/ ревнителя и подражателя Авраама онаго, /
иже о истине праведна явльшагося, / у Христа
предстоящаго, / о нас молящагося.

Слава, глас 6:

Ради кроткого раба Твоего Давида, / по
заповедем Твоим пред Тобою ходившаго, /
многия роду израильскому являл еси
благодеяния, Боже наш, / благодетелен убо буди
и нам, / ради правоверного раба Твоего
Юстиниана, / течение жизни своея / по
заповедем Твоим совершившаго.

И ныне, Богородичен:

Чистая Дево, Слова врата, / Бога нашего Мати,
/ моли спастися нам.

Славословие великое и отпуст.

На Литургии

Блаженны от канона песни 3-я и 6-я на 8.

Прокимен, глас 7: Возвеселится праведник о
Господе / и уповаet на Него.

Стих: Что воздам Господеву о всех, яже воздаде
ми?

Апостол к Галатам, зачало 213. Аллилуия, глас 4:
Праведник, яко финикс процветет, яко кедр,
иже в Ливане, умножится.

Евангелие от Матфея, зачало 11. Причастен:
В память вечную: